



[www.BibleForChildren.org](http://www.BibleForChildren.org)



Juan 14



Kinunen manin nè Jésus kadito adalan na, “Madi kayu kuma madanagan winno masicsikuran maipanggep iya ipapanaw ku, no di lugud mamati kayu è Apu Diyus sè mamati kayu met pè iyaken. Enna edyan nè Amac, adu ya pagedyanan, ket mawé yac mangisagana ka pagedyanan nu.”



“Tutu met yan, ta madic met ibaga dakayu no bekken nga pudnu. Mawé yac ngarud, ket kalpasan niya panangisaganac iya pagedyanan nu ennan, sumoli yac met nga umbèt nakayu alaken, tasun ya pagedyanac, itu met pé ya pagedyanan nu.”



Iyaken nga Juan nga kabsat nu ka pammati, ket  
gapu iya pannakaitipun tida é Jésus, kabulun dac  
met iya panagsagaba gapu igina, sè iya


pannakairaman kadiya iturayan na,  
sè iya panaganus nga

sinanama  
gapu igina.




Ket gapu iya panangikasabac iya kagi né Apu  
Diyus, sé gapu iya panangipakaemmu né  
Jéesus, uwed dac itun iya puru nga


maawagan ka Patmus.




Ket sigida nga naidalan nac gapu iya Ispiritu né Apu Diyus. Ket ya nasingec, ket isa nga trunu nga naisaad ka langit, ket uwed nakatugew iyanin.




Ket itun, nagicnac diya kinagkagi diya amin nga naparsuwa nga uwed ka langit, sé diya uwed iya lubung, sé diya uwed iya uneg niya ginet, sé diya uwed ka baybay.



Ngarud, nagicnac diya kinagkagi diya amin-amin nga naparsuwa, nga kinunen da, “Pagipaayan ngarud ya nakatugew iya trunu sè ya Urbun Karnéru ka amin nga pateg, dayaw, kinaari, sè pannakabalin ka agnanayun nga awan patingga na!” kunen da.




Ket nasingec itun ya Hérusalèm nga siyudad nga ipatpateg né Apu Diyus, nga itu ya kabarbaru nga Hérusalèm. Ket agpaspasegged mettin yan nga siyudad manipud ka langit, nga gayat é Apu Diyus. Ket naisagana nga napaw-isin to siyudad, nga arig met nga isa nga nubyá nga nakakawwes ka napaw-is tasun maisabet iya nubyu na iya pakalun da.




Ket nagicnac itun ya isa nga nabileg nga timec nga gayat ito trunu ka langit, nga kinunen na, “Kad yan! Uwed kadiya toltoley yin ya pagedyanan nè Apu Diyus, ket makipagedyan met ngé Apu Diyus igidan. Ket iya agten iyan, igida nad ngarud diya toley nè Apu Diyus.

Ket è Apu


Diyus,  
makibulun  
mettas igida, ket  
igina ya Diyus da.”



Ket itun, uwed manin nipasingen nito anghèl iyaken, nga wangag nga uwed danum na nga mangécdé ka agnanayun nga biyag. Ket nakalitlitaw to danum na, nga agten met iya kristal nga masarang. Ket to ayus na, timaud ito trunu nga pagtugawan né Apu Diyus sé ya Urbun Karnéru.



Sé madi met masapul ya sinag winno ya bulan nga mangwada ito siudad, ta ya dayag mettas nē Apu Diyus ya mangwadwada antuni nin. Ket ya Urbun Karnéru, igeria met ya pagdilag niyan nga siudad.



Ngem awan pulus makauneg nad antuni nga orey nagan na nga bekken nga naibilang nga nadalus iya imatang né Apu Diyus. Sè madi nad pé makauneg antuni diya agwangwangel ka nakal-alyew, winno diya agbusbusid. Ta diya makitipun nad iyan nga siudad, diyan nas naisurat ya nagan da ito libru niya Urbun Karnéru, nga itu ya nakaisuratan diya nagnagan diya maécdan ka biyag nga agnanayun.




“Ket liwliwaen na da nad nga punasen na diya amin nga luwa da. Awan nad matey yin, winno agladingitin. Awan nad pē agberritin winno agrigatin, gapu ta nakabas mettin dito daan nga banbanag,” kunen na.




Ket awan nad pulus mailunud iya imatang né Apu Diyus antuni nin. Ket to trunu nga pagtugawan né Apu Diyus sè ya Urbun Karnéru, itu nga gennung ya uwed nad iyan nga siyudad. Ket diya agsirsirbi é Apu Diyus, agdaydayaw da nad iginia antuni.


Masingen da nad ya rupa na mettas, ket maisurat nad ya nagan na iya muging da.




Ket nasingec itun diya natey, nga mabigbig sé  
nanumu, nga agsisikad iya sangu nito trunu. Ket uwed  
met liblibru nga mabicbicrad antuni nin. Ket nabicrad  
pé yin ya sabali nga libru itun, nga itu to libru nga  
nakaisuratan diya nagnagan diya  
maécdan ka biyag nga agnanayun. Ket  
nakedngan met itunin ya kasasaad  
dito nat-atey,  
maikanatad kadiya  
winangwangel da nga  
naisurat kadito liblibru.




Ngarud, to dackel nga pagapuyan, itu ya  
nakaipisukanin dito orey nagan na nga awan nagan da  
nga naisurat ito libru nga nakaisuratan diya nagnagan  
diya maecdan ka biyag nga agnanayun.



Ket, “Umbét ka kuma ngin!” kunen met niya Ispiritu né Apu Diyus sé ya Nubyá. Ket diya makagicna idi nga ayab, kunen da kuma pé, “Umbét ka kuma ngin!”



Ket diya mewwew, umadenni da kuma ngarud nga makiinum, ta mapalubusan mettin diya mayat nga makiinum ito danum nga mangécdé ka biyag, ket awan pè bayad na.



Tutu met yan, ta gapu iya napalaus nga  
panagayat nè Apu Diyus kadiya toltoley  
idi nga lubung, niyawat na ya kackaisu  
nga Anac na, tasun amin nga mamati  
igina, madi mapukaw, no di lugud  
maècdn ka agnanayun  
nga biyag.



Ruma 3:23 Ta amin tida, nagbasul tida met, ket awan dactida ya makabael nga mairaman iya nadayaw nga kasasaad né Apu Diyus.

Ruma 6:23 Ta ya supapac niya basul, ket patey. Ngem biyag nga agnanayun met nga gennung ya isagut né Apu Diyus dactida gapu iya pannakaibulun tida é Kristu Jésus nga Apu tida.

Hébriyu 9:27 Ket no dactida nga toley, sigud nga naikeddeng nga matey tida ka maménsan, ket kalpasan na, uwed pé yin ya panangukum né Apu Diyus.



Epésu 2:8,9 Ta gapu was iya siaayat nga asi né Apu Diyus, ket naisalakan kayu ngarud gapu iya panamati nu. Ket ya pannakaisalakan nu, bekken ngarud nga gapu iya bukud nu nga winangel, no di lugud gapu ta nikaasi né Apu Diyus dakayu. Ta no mabalin tida nga maisalakan kuma gapu was iya winangel tida, mabalin nga uwed pagtangsit tida. Ngem bekken met nga agten iyan.

Ruma 10:9,10 Ket idi ngarud ya banag niya kagi nga ikaskasaba mi: No ibalikas mu nga ipakaemmum nga tutu nga è Jésus ya ibilang mu nga Apum, sè no patiyem iya lemlemmet mu nga iginá ket pinagungar ngarud né Apu Diyus, ket maisalakan ka nad met.

Ta gapu iya panamati tida nga tumaud iya lemlemmet tida, maibilang tida nga nalinteg iya imatang né Apu Diyus. Ket sè gapu pé iya panangibalikas tida nga panangipakaemmu tida maipanggep iya panamati tida, ket maisalakan tida.



Juan 3:16,17 Tutu met yan, ta gapu iya napalaus nga panagayat nē Apu Diyus kadiya toltoley idi nga lubung, niyawat na ya kackaisu nga Anac na, tasun amin nga mamati igina, madi mapukaw, no di lugud maecdan ka agnanayun nga biyag.

Ta nibon nē Apu Diyus ya Anac na idi nga lubung tasun maisalakan kuma diya toley gapu igina, nga bekken nga tasun ukumen na da.

1 Juan 5:11-13 Ket ya banag nidi nga panangipanecnec nē Apu Diyus maipanggep iya Anac na, agten idi: Nēcdan nactida ngē Apu Diyus ka agnanayun nga biyag, ket ya Anac na mettas ya paggayatan niyan nga biyag.



Juan 14; 2 Kurintu 5; Paltiing 4, 21, 22

Storyline by: Edward D. Hughes

Illustrated by: Lazarus  
and Alastair Paterson

Adapted by: Sarah S.

Adasen (tui) © 1990 New Tribes Mission, Sanford, FL  
32771-1487, USA. Printed in the Philippines.

<https://www.bible.com/en-GB/bible/2812/MAT.1>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

